

皇明疏議輯略

皇明疏議輯畧卷七

修省下

彌災脩德疏

姚夔

臣切見今年春抵夏天氣寒慘風聲怒號捲砂揚塵陰霾
四翳日色無光近一二日來黃霧蔽天晝夜不見星日况
今四月初旬雷不發聲考之洪範庶徵恒寒恒風急迫蒙
昧之徵也月令季春行冬令則寒氣時發草木皆肅國有
大恐傳記文又謂大風黃霧白日沉沉政化未明之象又
雲雷於天地為長子主發生出則興利入君之柄也雷發
不發則號今天常天道如此驗之人事必有所因遠者建

州殘賊要結及頻海西窺覲邊境北虜郊里孩藏形迹
謀未可測兩廣北方瘡痍日甚荆襄流民壅聚日多加以
湖廣江西去歲荒旱無收浙江處州近日強盜流劫四川
雖常告捷郡縣賊徒蠲起大軍尚未班師四方事勢無時
寧帖百姓供給日見勞憊人事如此天其或者仁愛皇
上因以警動之手臣等俱以庸才叨居重任擬取國計之
急切者一二上陳伏惟皇上春秋鼎盛之日正綱綱繁
衍之時奈何震位尚虛切繫人望天與祖宗之靈固自有
待然臣區區愛戀之私有不能已前代遠事不敢援引竊
見英宗睿皇帝踐祚以來克遵祖訓以御家邦后妃

以下皆有關雎之德僉斯之美所以子孫衆多本支隆茂
伏乞 皇上脩身養德感天格祖思國本之爲不輕思宗
社之爲至重思聖體之當慎惜思聖愛之當均溥將見六
宮奉職則百斯男九廟降祥本文百世實爲天下大幸然
此自身心用力非求神奉佛所能致也若山西塔院勞民
傷財宜在停罷阿吒哩之流惑世誣民宜在斥回其餘庫
府金銀綵段俱是民間膏髓不宜浪費內勾諸作匠役未
爲重大勲勞不宜濫與官爵此皆足以感傷和氣而召災
異者也先儒真德秀有言人主脩德講學則天下安昆蟲
草木亦得其所此言誠爲至論伏乞痛自省改每日視朝

之後依 祖宗故事駕詣文華殿留心講筵裁決政事開
誠心布公道以來善言親君子遠小人以圖治化凡百服
食言動悉依 祖宗舊規如此而天意有不回災禍有不
除臣甘萬死不辭

災異疏

馬文昇

竊惟災異之見必有由然乃天心仁愛人君歆其恐懼脩
省轉禍爲福而保天位於悠久也仰惟 皇上即位以來
誠以格上帝孝以奉兩宮仁以惠群黎誠以御臣下宜其
諸福之物可致之祥莫不畢至然而猶有災異者實由蒼
生困苦已極而無拯救之術群小恣其奸蠹而無禁戢之

令織造未息府藏益見其空虛齋醮頻仍供辦日見其逼
迫官吏貪殘而無所畏懼法令廢弛而未能振舉軍民困
土勢豪霸占修造宮役士卒疲勞賦重徭繁民困財竭嗟
怨之氣上干於天亦由臣等苟竊厚祿以掌銓衡不能奉
宣德意藻鑑人才之所致耳豈一政之或非一事之失宜
而遽致此哉伏望念今日所居之位乃 祖宗之位必思
保守之甚難今日所治之民乃 祖宗之民必思愛養之
甚至法天之剛而勤以理萬機體步之節而儉以省財用
凡臣下奏疏斷自宸衷乘而行之久而弗渝則天意可回
災異可禱宗社靈長而天位永久矣是故裁冗官者所以

省財用也冗員不去則財用不足一遇兵荒必至於措置無術此自然之理也仰惟我祖宗法古爲制官有定員俸有常數近年宗室滋多武職太濫祿米俸糧所費甚繁而京儲肝藏所餘無幾且在京額設大小官員不過一千三百餘員其傳奉等官將有八百餘員中間管支俸給有皂隸者尚有五百九十一員每歲支米不下萬餘石而折銀折絹又不止數萬兩若因太濫建而効勞傳陞一級固不爲過其或織造染作之屬俱職之所當爲者一槩濫陞而冒費何哉蓋不過各官内外私其所屬之人耳上下相蒙糜耗財用此所以啓公論之騰沸而致國體之漸虧也

且古者官以待功賞以酬勞今此各官不過曲藝不能之
末冒叨官職妄費俸糧月計不足歲計有餘況今府藏空
虛民財已盡災異示警意或在斯正宜沙汰冗官撙節浮
費之日也宋司馬光謂天地生財止有此數不在官則在
民當今天下地方所出者有常數而國用所費者無常數
方來耗損匱乏之患將必日甚一日矣是以文武臣僚屢
嘗爲 皇上言之若能減一官則省一官之俸寬一分則
民受一分之賜消彌災異莫有急於此者杜奔競者所以
彰國典也故三年朝覲大明黜陟乃 國家之定制未之
有改者豈惟我朝自三代以及漢唐宋亦未之有改也故

曰三載考績三年黜陟幽明又曰諸侯各朝于方岳大明
黜陟蓋有功不進有罪不黜雖堯舜不能平治天下昔人
論人主之職惟在進賢退不肖而已蓋天下人材一人之
聰明或不能徧知也故不自用而付之吏部又付之都察
院數人之聰明又不能徧知也故不自用而付之公論公
論者何諫官之所論列方岳之所開報與衆人之所議論
耳目之所聞見然之於衆審之於獨吏部之所不可察院
以爲可則不敢去也察院之所可吏部以爲不可士論或
以爲可則不敢去也然任反覆必求無負乎朝廷付託
之意然後已今陛下以臣爲不足信乎不當使待罪此

位以爲足信乎不當復爲掣肘既已去之又復留之則去者誰不自陳以覲復留之幸昔范仲淹爲宰相凡不才監可一筆勾去富弼曰如一家哭何仲淹曰一家哭何如一路哭古今以爲名言自古人君之於小人惟恐去之不早除之不決未聞有所愛惜而不忍去之者也 陛下仁覆如天曲爲保護其如小人之不可長何中外之人窺見此意紛紛而起故胡孝之後王璠繼之王璠之後邵賢方誌繼之方誌之後朱贛又繼之雖遠如鍾越任穀之徒亦皆播告而來後之紛紛者尚未知所止也况今九載考績之典有陞無黜若三載考察之典又復不行則貪官污吏徧

病天下成害 陛下之赤子復誰敢去之乎 陛下以此
不職之數人爲可惜則天下數千百萬困苦之蒼生獨不
可惜乎臣等於此數人者豈嘗有所怨讎特以國法所在
民命所關不得不然耳今賴 皇上遵 祖宗之制徇衆
論之公胡孝等未遂其奸人心罔不稱快近日以來奏辯
者少息无望 陛下自今以後若再有考察黜退官員奏
擾者下之法司明正其罪則貪黷有所畏奔競有所沮而
不敢肆無忌憚矣至若革濫進之自所以通選法也蓋爲政
在人官得其人則政無不理民無不安而天下治矣自古
君天下者必以畜養人才爲先務也仰惟我 皇上法古

爲治凡庶官用人惟由科目以及貢監此外縹流者不得
并用前時三年大比鄉試所取不多會試進士亦爲有數
其歲貢監生每府一年貢一人州則每三年貢二人縣則
每二年貢一人入監之後不數年卽取舉事又不數年卽
爲選用在部無淹滯久積之弊所以入仕多精明廉潔之
人迨至天順年間憲臣建議起送天下在學年四十以上
生員送監讀書奉旨各生實錄作弊有方三十五六或方
三十者亦作四十起送之數共有五千餘名旣而胡虜犯
邊急缺戰馬復許生員納馬入監又有七千餘名以後川
陝荒歉軍民莫暇守臣具奏又聞上糧入監之例通前共

有數萬餘人中間多係幼年不學之徒既爲監生須撥歷事其舉監雖年壯氣豪者亦與彼挨次取選始終二十餘年方得出身長者老耄壯者衰弱因此貪人財物豈能展布行事所以官不得人民多受害至今未選納粟監生尚有七千餘名大壞選法壅滯人才率由於此本部雖有奏革一遇兵荒未免復開况蠲富民之徭役以重困貧民所損國體甚大不可不嚴爲禁止也

脩省以謹天戒疏

柴昇

臣聞之書曰先王克謹天戒臣人克有常憲百官修輔厥后惟明明者誠以災變之來治世不免應各有類未嘗妄

發顧涓彌之者何如耳是以先王有見於此為君者必恐
懼脩省以消災變為臣者必奉法脩職以供乃事至於百
官之衆莫不各脩其職以輔其君故君內無失德外無失
政災異以彌咎不為凶此其所以為明明后也仰惟 皇
上繼隆丕祚宵旰孜孜三載憂勞有如一曰服命之初昔
抑浮侈革從儉約志祀上下祇薦宗廟表勵臣工勤恤民
隱出入起居罔有弗欽發號施令罔有不臧是宜嘉祥迭
見繁祉駢集夫何頻年各處奏報災異歲無虛月以天文
則有龍電雲雷之間作日蝕星變之交馳以地理則有山
鳴地震之屢報河決水溢之相仍以人民則往往有螟蝗

旱澇之災在在皆饑饉流離之苦災譴不一而足考之紀
傳所載未有若此之多者也臣於近日得之道路傳聞咸
謂十漢之間復有星緯之變臣愚不諳天文參人之言理
亦或有以故文武群臣罔不悉心傾耳意朝廷之上必
有宣諭脩省而數日之間寂然無聞外議沸騰群心滋惑
臣愚獨有以仰窺 陛下益歆應天以實不以文動人以
行不以言故斷自 聖心引咎歸己默加脩省不以外聞
深有合于虞帝儆予之心商湯罪己之意三代以下之君
誠未有臻此者也然臣竊思之以 陛下一德無間克享
天心端拱法宮動無過舉凡此咎徵豈所宜然皆由左右

之臣不能竭沃心輔德之託百官之衆不能盡體國恤民之實而臣等待罪言責者之蹇謬匪躬之士一切因循遂成弊習百政僂滯精白罕著事有召姦添多階隙用舍乖違人情鬱抑沴氣成象咎徵由斯是以今日星文垂異臣已灼知爲臣下不恭之戒矣豈可皇皇然獨貽憂於

陛下也雖然亦足以見天心之於我皇家諄諄存顧先幾預告以啓聖心蓋欲陛下據易圖難緣微警者奮揚乾德固執主威銷壓未萌以光前烈也陛下誠不可不加之意焉賴惟聖光昭晰痛自脩省畏天之威諒非爲虛以臣之愚自古君臣同體逸勤胥及豈有主憂而臣不

知天變而臣不與者哉亦宜渙發明詔以示臣工蓋以朝廷凡百政體君執其要臣理其細君臣之間脩省之義豈宜異同夫災非倘來必有所以致災之由變不虛出必有所以召變之端如徵在君身必謀何以建皇極大中之準如徵在群臣必謀何以東進賢退不肖之公徵在四夷何以善制遠安邊之策徵在小民何以布綏懷保惠之仁其徵於權奸也必思所以潛消預奪之機安在其徵於貴戚也必思所以橫施濫恩之典當懲推此以往稽之衆人之中必有超群之見陛下采而行之用裨政闕則事炳幾先患皆有備雖有天災不能爲之災雖有時變不能爲之

變商宗以是而啓聖周宣以是而中興有足徵矣厥後季
世之君及漢唐以來庸辟暗主率有天變于上而不悟民
怨于下而不畏謂天命爲可恃謂人言不足卹玩災成敗
莫可救濟史冊相望歷可指陳竊惟陛下天資挺異英
睿夙成端可高揖于舜禹之上安行于唐虞之域豈所望
出於商宗周宣之下哉臣又遙聞荆襄鄭漢之交山深谷
險財盡民窮流賊聚劫猶未散息恐屯嘯日廣釀成大患
及見北虜醜類數假進貢窺我邊隙倏去忽來禍機莫
測誠欲絕其來則逼吾柔遠之畧縱其入則墮彼貪狡之
計屢屢皇上晞咎及覆計無善處臣竊憂之此正人君

遇災思患側身來享之秋也夫何今茲踰旬星變日著臣
下默然罔知戒懼而陛下罪已之言不形于詔旨思患
之謀不及于咨詢臣恐小民愚蠢罔測淵衷不知陛下
引咎受愆憂勞內切不欲彰聞恐駭物聽咸謂陛下遠
遠天戒虛而不答則是陛下誠有畏天之心而群臣
不能盡體誠有思民之實而小民不能必信甚非人王合
群離卒天下之道也揆之古昔聖帝明王懼災求理之術
恐不若是爲謹而臣愚伏望陛下仰察天文俯求人事
果有咎變其徵非虛推畏天之心以宣戒乎百工弘求理
之道以博延乎群議則内外交脩名實俱舉庶可答皇天

譴告之威慰元元困苦之望以彰陛下之盛德繫天下之歸心不亦偉哉

災異疏

江淵

臣竊見今歲六月初一日朔旦日食謹按春秋之書日食或妾婦乘其夫或臣子背君父或政權在臣下或夷狄侵中國皆陽微陰盛之證而先儒胡安國以爲日者衆陽之宗人君之象克謹天戒則雖有其象而無其應弗克畏天則必召災天之示人可謂顯矣伏惟皇上以聖神之德居至尊之位削平僭亂中興邦家踐祚以來勤於宵旰董正庶官選賢任能恢弘治理而又進講經筵以求帝王爲

治之道大開言路以通天下幽隱之情圖治之心可謂切
矣夫何上天告戒不一而足今春土星恒近日太白晝見
今又日食於朔日視朝之時夫豈無故而然哉其必廢官
失德紀綱不振汰度縱弛大政乖缺而致之也況今胡虜
日近邊境入寇爲患不言可知且天心眷愛人主凡有災
祥必先示之以兆歆其脩德政以圖承天休保無疆之治
也臣伏望 皇上思 祖宗付託之重念繼統守成之難
因天告戒惕然恐懼戒膳徹樂避御正殿庶求直言者已
有過則速改之更加嚴畏復召一二大臣講求所以敬天
法祖保邦致治安邊禦寇之策君臣同心無事虛言務敦

實行見諸事功則天變可消人心自順國治兵強狄夷之
禍不足慮矣臣見今春星變之異大臣亦嘗上言來退
朝廷未允其情其餘當退者則又貪位顧祿濫冒無耻莫
此爲甚且天地以至誠無息故能成其覆載之功人之應
天亦必至誠無偽而後可以格天豈可以虛偽動之哉臣
實自愧才識疎淺過承拔擢捐軀報稱惟恐或後然自歷
任將及二載叨祿苟容分毫無補上孤天恩下招衆議
皇上天地之量曲爲包容而臣犬馬之心誠不自安乞將
臣先行黜罷放歸田畝以答天意以謝天下則其餘如臣
之濫冒不才者亦必自省知愧退避賢路然後陛下慎

簡中外賢才以資任使以召天地之和以開萬載太平之治不勝幸甚

懷順彌災疏

何喬新

臣等仰惟陛下嗣位以來勵精圖治約已裕人召用老成貶斥邪佞臺諫有言常舍已以從之刑獄有疑每屈法以宥之宜夫和氣召祥雨暘時若星緯順度山川咸寧矣然雨雹風霆天鳴地震迭見於四方之奏報今京師畿甸又有此水災良由臣等任職無狀不能奉宣德意之所致耳俯躬省咎罪不容誅竊伏思之水陰類也以地言之則中國爲陽夷狄爲陰以人言之則君子爲陽小人爲陰以

政事言之則德爲陽刑爲陰洪範庶徵皆由人事所感今
水雨爲災意者夷狄之謀侵邊歟小人之或干政歟皆非
愚臣之所能知臣等亦不敢越職而言獨以臣職掌言之
恐天下刑罰未盡當此亦致災之一端也夫民情狡詐百
端而隱慝未易遽察問囚者止據原詞審錄者多拘成案
至於人命強盜情尤難明人命或因鬪殺誤殺而檢勘者
輒以爲謀故盜賊或係搶奪拒捕而巡捕者輒以爲強劫
苟非的有證佐誰敢輕與辯明縱欲辯之衆口譁然或以
爲受囑或以爲納賄以故好名畏謗者寧失入而不敢輕
出誠以公道之難明而謗議之易騰此天下之通患也以

在京法司尚且顧忌如此則在外可知矣昔臯陶稱舜曰
與其殺不辜寧失不經聖人之仁蓋如此伏望 陛下因
雨水之災廣好生之德特勅兩京法司將見監重囚再行
詳審凡情有可矜法有可疑及人命無屍可檢強盜追無
賊仗者備開矜疑緣由具奏取自 聖裁在外各布政司
及直隸府衛州縣有巡撫者勅巡撫都御史會同巡按并
都布按三司官審錄無巡撫者勅巡按御史會同三司并
直隸府衛正官審錄中間有可矜疑者具實以聞仍下法
司參詳取旨定奪其各處該決重囚亦令決囚官員照奉
欽依事理情真罪當者就行處決若有稱冤異詞及情可

矜疑者卽與辯理具奏處治庶幾刑獄不冤災變可彌矣
臣等又聞正統四年六月京師大水為災英宗睿皇帝
勅戶部侍郎吳璽順天府尹姜濤存問軍民被水之家具
奏賑卹又條示合行事宜勅五府六部都察院等衙門各
脩其職今陛下率由祖宗令典已命巡城御史查勘
京城內外被水軍民給糧賑卹矣其通州一帶水患尤甚
乞勅該部委官查勘一體賑卹係官錢糧果被漂流者量
為分豁俾聖澤沾被無間遠邇其各衙門合行事宜亦乞
遵聖祖勅諭斟酌而行之萬機之暇召問內閣及文武
大臣詢訪致災之由同加脩省至於脩德以凝天命正心

新學集卷二 前二
以端治原勤聖學以講求治道法 祖宗以輯寧邦家此
以敬天勤民之大本也尤乞 聖心加之意焉

脩人事以彌災異疏

李承勛

臣聞天道遠而難識人事近而可徵故曰天視自我民視
天聽自我民聽人事失於下而天心悅於上未之有也人
事得於下而天意怒於上亦未之有也商之高宗有雉鳴
之異周之宣王罹旱魃之災皆能克謹天戒益脩人事卒
以中興然則災異之出乃所以至成其德也臣章句腐儒
異災之說非其所知而本諸人事之可憂者粗見一二謹
爲 陛下言之往時各衛違賊其牧止於鼠竊今則傳箭

號召千萬爲群演陣縛梯攻城奪堡中間多有中華亡命爲彼所用若或奸雄乘間禍忍言哉此人事之可憂者一也禦寇必資於兵馬防守必賴於塞垣以言乎兵馬則巡死十常七八以言乎塞垣則堅完十無二三賊日加強而兵馬日益削弱敵日轉近而邊防日益廢弛坐視而不爲之所則衣冠之地將胥淪於夷起而強爲之則外患未除而元氣先損此人事之可憂者二也數年以來水旱相仍穀價湧貴十倍常時萬一不辜秋稼無收既乏積蓄尤難轉輸全鎮軍民何恃爲命若至此時而後圖之雖有智者無如之何矣唐陸贄有言兵之所毛食最爲急若無儲蓄

是棄封疆自昔敗亂之由多因饋餉不足三復斯語豈可不爲寒心哉此人事之可憂者三也近差中貴遠使朝鮮用車甚衆所齎必多沿途科索不可勝言臣嘗私憂過慮誠恐所爲無名所求無厭取笑小夷或開邊釁此人事之可憂者四也伏惟 皇上天生聖人入續大統盡逐奸邪起用耆舊四海欣欣思望太平災異頻繁正天心所以仁愛 陛下也伏望 陛下思天變之可畏念人事之可憂謀於廷臣先事而備則封域之重臣職不當及者必有人爲陛下及之可憂之大臣所未敢言者必有人爲 陛下言之天下嗷嗷正今日 聖主之資也

脩德彌災疏

呂雯

臣聞商書曰惟吉凶不僭在人惟天降災祥在德天下之治安常以聽直言近正人公喜怒消朋黨明法度節財用謹興兵不事遊觀不邇聲色不惑佛老非獨治安也榮莫大焉天下之危亂常在於逆忠直近讒佞私好惡縱朋黨紊法度費財用好攻戰事遊觀惑聲色尚佛老非特危亂也辱莫甚焉方今皇上稟堯舜聰明之資聖德學問日益光明求賢納諫聲聞中外乃者彗星見於西自天津而徂瑩齊按漢曆志有掃除之意或為兵火之象昔齊景公彗星見而蒯安子曰穿池沼則欲深以廣為臺榭則欲

高且大賦欽太急刑罰太重彗星之出庸可懼也仰惟
皇上心懷恐懼致齋便殿告祭于天不越日而彗星消微
凡在臣民無不仰覩咸知陛下因變而增脩其德所以
一念之誠感格於天如周宣之側身脩行而彌災宋景公
出人君之言而妖星退舍陛下今日之所行以周宣宋
景為不足學必遠宗堯舜禹湯文武之道近守祖宗列
聖之成法經筵日講聖政日新然臣聞諛諛軟熟之言
易於聽無益於治忠鯁法度之言逆於耳有補於治譬如
良藥苦口而利於病焉臣聞孔子作春秋不書祥瑞而書
災異蓋欲謹戒人君使知恐懼脩省以應天變亦以見天

心仁愛人君故出災異以譴告之蓋天變之發或發於未然之前或發於已然之後是雖隱微難知皆所以覺悟人君也所謂應天變之術豈有他哉在於脩人事而已臣伏見陛下即位以來四年于茲凡所施爲無非仰答天心下當人意勤儉憂勤不聞有過然應天以實不以文恐舉措之間安得每事盡善亦當窮究致異之由推至誠行直道政事之不中不平者或未加治軍民之失業窮困者或未加恤姦邪之徒熒惑聖聽者或未加察一皆省之於身惟中惟平之事行則陰陽和而天變息矣何太平之不可致哉

不事虛文以彌災變疏

吳巖

臣愚伏聞本年正月 乾清宮災臣不勝驚惕憂慮之至以累朝經營之成業一旦煨燼其為災變未有若是大者臣嘗考之往史變不虛生必有感召雖上天仁愛之意顧人君脩省之何如耳若能應天以實則一誠感格可以轉災為祥若徒事虛文則反為棄天而適激其怒恐將來之變更有臣下所不忍言者恭聞 陛下果能祗畏天變悔悟方切頒脩省之令下來言之詔深得自古帝王彌災消變之道甚盛舉也而大小群臣亦知不易遭逢欽承德意自三公九卿以至科道諸司一時上言各陳所見有言

誠格 九廟者有言孝奉 二四宮者有言早朝安罷者有
言經筵日講者有言早建皇極者有言踈遠義子者有言
接儒臣以講求治道者有言出番僧以屏絕異端者有言
禁中市以肅內令者有言遣邊兵以謹外防者凡此皆今
日先務之急而所謂應天以實不事虛文要亦不出此數
者而諸臣一一爲 陛下懇懇言之可謂至矣 陛下當
此憂勤惕勵之餘正處仁遷義之日 聖德之所以隆替
世道之所以治忽天命之所以去留人心之所以得失其
機端在於此正宜遇災而懼痛加脩省慨往者之莫及與
來者之可追改絃易轍悔過自新於凡諸臣所言謹論即

賜俞允而次第施行。廢天意可回而災變可彌矣。夫何脩省之令雖頒而脩省之實未見。求言之詔雖下而納言之實未聞。除誠格九廟孝奉兩宮。臣不敢妄議外。竊聞視朝尚至日晏而連日之免尚復如舊也。筵講尚未盡舉而通宵之戲尚復如昨也。皇儲尚未聞建也。義子尚未聞遠也。儒臣尚未聞延接而番僧尚未聞屏絕也。中市尚未聞禁革而邊兵尚未聞遣還也。豈以天變不足畏。人言不足卹乎。抑亦諸臣之言迂遠而不切於事情。不足以動聖聽乎。且聞大學士楊廷和所上之疏。卽奉聖旨早朝。深居朕自處。治經筵等項。已有成規。邊兵只照前旨市肆。

常理西僧舊制俱不必改動是蓋陛下不欲聞諸臣逆
鱗之言而有此一時權應之旨至所謂常理舊制則臣未
敢以爲然也夫開肆乃市井之事稍有識見之士尚未屑
爲况於萬乘之尊而曰天子之常理固如此乎番僧乃夷
狄之教稍知禮義之家尚不容入况於大禁之內而曰
祖宗之舊制固如此乎揆之於前脩省之令似乎有背求
言之詔似乎有違如此而欲感動人心如此而欲挽回天
意如此而欲消彌災變難矣是以臣愚昧死爲陛下言
之若曰常理曰舊制豈有他哉不越乎前所謂誠格九
廟也孝奉兩宮也早朝晏罷也經筵日講也建皇儲也

遠義子也接儒臣也絕番僧也革中市也遣邊兵也是則
所謂常理也是則所謂舊制也若舍此數者而別求所謂
常理所謂舊制抑末矣伏望 陛下體 上天仁愛之心
念下民仰望之切思 太祖 太宗創業之艱為 聖子
神孫嗣守之地省躬脩德勵精圖治非徒言之實允蹈之
如此則應天以實不事虛文 聖德日隆世道日治天命
以留人心以得而太平可坐致矣殆見以和召和以順感
順而諸福之物可致之祥莫不畢至實 宗社無疆之休
萬世莫大之慶豈特消彌災變而已哉

脩政彌災疏

范珠

臣按春秋凡書災異未有無其應者然古者人君遇災而懼克謹天戒雖有其象而無其應如克正厥事而雉雉不爲異側身脩行而旱魃不爲災漢唐宋以來英君誼辟每遇災異必減膳避殿求直言之士罷不急之務躬自剋責百為脩省用能挽回天意轉禍為福其間遇災而不知懼者多緣左右近習之蒙蔽或宰執廢臣之獻諂委於下人之感召託為陰陽之常事其者指災為祥以異為瑞上下相安釀成禍患且天之於君猶父之於子自能仁愛終無絕道君有所失天必昭鑒小則出災異以譴告之大則出恠異以警懼之無非欲其及將以備人事更圖以收治功

譴告之頻警懼之數而猶不悟則自取傷敗尚誰懟哉所以從古以來明盛之日常少晦訛之日常多信史具存足為明鑒臣以國家邇來災異迭見豈無召致之由天象既垂必有事機之應一二年間御史不以言給事中不以聞翰林院不能考據以敷陳於經筵欽天監不能占候以推衍其事應豈以水旱堯湯所不免而天變不足畏乎不然何彼此緘默恬不為懼雖聖聰務於博聞而事每缺於上達因循如此將何以回天意而安人心乎臣切以惟天子可以祚天地以其地位相屬而氣與之相感耳緣前災異豈徒謂尋常所召臣伏願陛下引咎在躬脩舉時

政而後貴宰執大臣以任政之不逮如此則天意可回人心自安諸福之物可致之祥將不期而至矣臣謹以八事爲陛下言之一開講讀以熙聖學臣聞傳說告高宗曰王人求多聞時惟建事學於古訓乃有獲不師古以克永世匪說攸聞古者聖帝明王道積厥躬德脩罔覺而卒收治功者未常不資於學也漢光武日引公卿即將講論經理夜分乃寢而太子勸其順愛精神則曰我自樂此不爲疲也唐太宗於周禮一書夜誦不倦宋太祖雖在軍中手不釋卷太宗讀書日已至申方休因宋琪以勞瘁爲諫諭之曰開卷有益不爲勞也然其所學豈直俗儒稽同合

異為訓詁之末緒章繪句為文辭之習誦其言究其理體
之於心身見之於事為又以考驗古昔用人行政之得失
興衰治亂之所由之數君者所以冒次明白措施無爽而
當時治功之美可考若梁高祖之誦三誓天災臨而不悟
孝元之講老子魏師至而不知非惟無補於事而且不免
於患此又務學之得失足為世勸戒如此我祖宗列聖
莫不勤於問學又以其暇廣為制作訓戒臣下伏惟陛下
下聰明先物睿知有臨得於天資者固足以符合前聖而
輔養之道不可不至也然經筵之設歲有常月有常日
未免一暴十寒前作後輟臣請經筵之外簡擇儒臣中義

聖精詳語言明正者或三日五日或不拘日召至便殿講
說聖經賢傳與歷代典故群臣奏議及我祖宗寶訓文
理長者一二章短者三五章務使連屬辭旨摘略而不
備反覆辨析毋避忌而不盡隨事獻規因言求實歲月既
久必能緝熙聖學培養聖德一擇輔道以隆國本臣
聞古之王者太子始生有司齋肅端冕見之南郊過廟則
下過闕則趨自其為赤子而教固已行矣及孩提有識三
公三少明孝弟仁義以道習之逐去邪人輔以正士而德
無不成夫三代之所以享國長久以其輔翼太子有此具
也後世或以律令為教或以奕棋得奉如秦之趙高唐之

至任出入青宮益其嗜殺之心導以逸豫之習匪惟為國
致亂而禍敗隨以及已我太祖高皇帝稽古為治特置
東宮官屬有三師三少之徒又有詹事春坊之設無非為
國本計也臣今切見東宮當幼冲之年正蒙養之日宜遴
選宅心公大學識醇正者以克官屬公大則不至於私媚
醇正則不失於迂腐然官雖備員而不親近亦虛耳須使
之朝夕與處出入必偕又在因其所明而誘之以正隨其
所尚而約之以中口不談佛道之書手不持珠玉之玩目
不親邪媚之色耳不聆淫蕩之音涵養其性情薰陶其氣
質習與智長化與心成俟年齡之既長又遂將以務學則

儲德自然成就矣一選諫官以開言路臣聞漢文帝詔曰
古之治天下朝有進善之旌誹謗之木所以通治道而來
諫也今法有誹謗妖言之罪是使衆臣不敢盡情而上無
由聞過失也將何以來遠方之賢良幸其除之夫後世官
以諫名得專其任奮忠死義代不乏人而時君每加獎異
以暴白其心志如史可考難以悉舉我太祖高皇帝特
置科道職專諫諍雖有簿書刑獄乃其餘事國初以來
不輕用人務求精選以言著名先後相繼一二年間科道
官員惟知作崖岸脩邊幅旅進旅出隨沉隨浮以敢言為
輕率以緘口為得體或滿考而未嘗舉劾一人或解任而

不聞建明一事骨鯁之風掃地盡矣假使其時爵賞果輕
有如釋之一斤嗇夫者乎事佛果侈有如歸愈之諫佛骨
者乎貢獻果濫有如溫造之劾李佑者乎姦佞果盛有如
朱雲之論張禹者乎一切不逮古人諸事去於時勢萬一
事關國家憂係社稷亦將如是而默默耶是蓋上有納言
之君下無放言之臣頽靡至此可謂太息臣請勅吏部今
後選用科道官員先求其氣節學識次取其人品標格負
氣節則執持堅固勢利難奪足以建事功有學識則智術
高明獻納平允足以裨治理苟不出斯二者而徒拘於人
品雖有伊尹周公之聖管仲裴度之賢亦為今之棄人矣

夫既因言選官必欲循名責實其各官考滿到部要見平
素舉劾何人建明何事以此定其殿最議其黜陟庶使人
皆効職官不徒設然選用既精而言不見納亦虛有其名
耳臣見往時言者稍侮權貴輕則箠楚之加重則撻打之
入甚者遷謫遐荒冤死暗昧唐陸贄對德宗云諫者多表
我之能奸諫者直示我之能賢諫者之狂誣明我之能怨
諫者之漏泄彰我之能從有一於此皆為盛德臣伏望
陛下求賢若渴從諫如流官既務於得人言必貴於採納
如此簡賢如此納言何勞廣設訪察何必大張法網數年
之後姦慝不去忠賢不進刑賞不清舉錯不公休祥不至

災殄不除中國不安外夷不服乞將臣戮於市曹以正今日妄言之罪一復舊舊以慰人望臣聞詩曰國無典刑尚有老成人言老成人重於典刑也故古者人君其臣閱世既久更事且熟係國家之安危為士庶之屬望雖年當休致必再三勉留非特尊寵舊亦以愛惜人才也臣訪得吏部尚書李秉兵部尚書王竑都御史韓雍夏壇高明李侃歷仕年久頗有令望或因讒謗而解官或托微恙而去任臣與各官素不相識亦不曾親親其謀猷設施果超出於流輩果無愧於古人但聞其命下之日趣裝即歸畧不顧惜棄捐筆要自分幽閑其與夫馳朱舄於桑榆負厚頹

於鍾漏惟念子孫之計殊愆羞惡之心老病侵尋強自支
持乞哀權貴冀後容留者膏壤懸絕况各官猶皆強健未
卽衰病士林仰慕將論攸歸名下必無虛士珠玉豈宜暗
投臣伏望 陛下將各官收用以補兩京之缺員以慰天
下之人望無使小人肆其離間不以微疵掩其大勲彼必
感激思奮將俾政績有成又足以彰我國家舉擢之無遺
才也一通事情以防壅蔽臣聞記曰王言如絲其出如綸
王言如綸其出如緯是知人主一號一令有目皆見一賞
一罰有耳畢聞可以質諸鬼神可以播諸夷狄如二帝三
王君臣同心翊贊戒敕之言禮樂法度之施使其闕而不

傳則書不得而載詩不得而誦史官無以紀錄後世何以
考據我祖宗列聖號令賞罰如雷霆霜雪人皆見聞雖
有姦諛無從為計往時朝廷降旨許各衙門傳報事無壅
遏情亦浹洽萬一用或非人行或非當大臣得以申論諫
官得以抗言今一切肯意不許傳報將使群下瞶瞶瘖瘖
面墻而立賞不知其所從罰莫測其所自機關已發於四
方是非獨蔽於目前若以為抄謄勞人則各官自有操牘
執翰之徒未嘗言已之病若以為漏泄機密則朝廷必無
遠嫌避忌之事未嘗畏人之知所以不令傳報莫辭其由
將恐小人乘此為壅蔽之計肆欺罔之姦塞下之耳目蒙

上之聰明其患亦非小也臣請今後凡遇內降旨意悉聽
各衙門官吏於午門前互相抄寫通行報知示以大公至
正之道不為瑣屑較計之私事既無壅情亦獲通誠裨助
化理之一端也一重守令以施教養臣聞漢宣帝嘗曰庶
民所以安其田里而忘嘆息愁恨之聲者政平訟理也與
我共此者其惟良二千石乎明帝又曰郎官出宰百里苟
非其人民受其殃是則親民之職莫若守令然漢史所載
循吏頗多今之府州縣正或自京職陞補或從科目除授
選用非不精委任非不專而迄無循良之風者皆以教化
之不立撫字之無方大槩俗弊任有司者以催辦錢穀為

能事以奉承上官為得體而司之臨府府之臨州州之臨縣不察俗之厚薄不問民之休戚首先計其迎送之遠邇伺其拜跪之疾徐假公濟私要一奉十稍拂其意便有文翁之教化陽成之撫字輕不免於罵詈重莫逃於箠楚每三年朝覲到部揀選之際而部院二三大臣豈能悉知天下之賢否其去取進退每徇於方面府正之一言其間善於奉承者貪墨指為公清暴虐稱為平恕失於阿附者髮鬚微白即目為老疾錢穀少負遂排為罷黜部院既云揀選若不因以去人又無從以塞責致使薰蕕並雜玉石俱焚夫以有虞建官三考黜陟在漢為吏或長子孫吏父於

官則人情不苟官久於事則理化有成今之有司不待考績而已罷官或未及生育而先去任為其身謀不暇孰肯以教養斯民為心哉且近例外官年及六十則去獨不思許丞廩吏重聽何妨汲黯多病淮陽臥治人非聖賢寸長可用甲以墨而黜代甲者狼毒益滋乙以臺而免繼乙者龍鍾尤甚如此而望斯民沐教養之澤難矣臣伏望陛下痛懲此弊特勅部院今後揀選不宜泛去去其貪暴柔懦之尤著聞者以示激勸博訪有司任內人和俗美雖科徵少緩不害為良牧則褒旌之恐後若民窮盜聚雖錢穀辦集未免為酷吏則黜逐之必先其方面府正非宿德重

望者不推州縣正官非科目出身者不與申風憲之職嚴
賊盜之罰使上下相維革去俗弊免其更代之煩冀收教
養之績則人有恒心事不苟作而民間迎送之費可以少
損庶幾漢廷循吏復見於今日矣一汰僧道以懲游惰臣
聞韓愈有云古之為民者四今之為民者六農之家一而
食粟之家六工之家一而用器之家六賈之家一而資焉
之家六柰之何民不窮且盜也蓋自有僧道以來其門戶
名號雖異而衣食日用則同豈假於鬼輸實由於人助歷
代若梁武帝捨身為佛家奴宋徽宗有道君之號當時二
家徒衆之盛可知然梁有臺城之厄宋有金人之禍曾不

聞一人赴難又不聞其神陰有所助是不惟有損於人而亦何益於國哉我太祖高皇帝鑒前季之失慮僧道之濫定為額數府不過四十州不過三十縣不過二十又著為律條不許私創建寺觀簪剃僧道蓋欲以漸而絕其根抵不使滋漫也豈意近年以來名勝之地非寺即觀游惰之民非簪即剃棄絕仁義蔑視君親變中國為戎夷化人類為禽獸然當豐收之年彼以和說誑誘愚俗謀為皆遂偶值凶歉其說不行或因飢寒所迫或為妖說所動如四川吳深荆襄石和尚遺患地方累歲不絕且往年一次放度僧共數萬人其間冒認父師益為鄉閭僥倖請牒之後

恣意所如官府不得辨驗關津不得盤詰軍民竈匠皆不
可知見今各邊軍伍不充有司差徭之人以京師目前觀
之備操赴工者率多疲瘵尪羸黃冠緇衣者悉皆豐肥俊
偉以此補伍則為精卒以此應役則為壯夫何乃縱之游
手游食為吾人之需哉况其屬通曉教典萬無一二縱淫
肆慾甚於常俗敗倫傷化莫過於此伏望 陛下痛加裁
治通行天下汰黜僧道拆毀寺觀則人知警懼不敢肆為
游惰以影避差役而為吾人祛除一大害矣一撫流移以
靖地方臣聞孔子曰遠人不服則脩文德以來之既來之
則安之古者待遠人尚然今之流民乃 朝廷之赤子語

言不異未服不殊非若蠻夷戎狄之比何忍驅之離散寘
之死地負 聖明之至仁傷天地之和氣往事之失不可
追咎臣於荆襄地方原未經歷遙聞彼中多是山林峻處
可以力耕火種平處可以墾田作居漁樵可以充用淘沙
可以獲金以此四方流移之民假息其間去奚不可且此
流民遠離鄉土輕棄墳塋豈得已哉或迫於官府之誅求
或艱於衣食之不足又或犯死刑而逃往或避重役而潛
住此處年久難以別白寘則住而安業急則散而為非所
以撫治官員貴於用法平恕而不可以威濟立心恒久而
不可要近功以威濟未免繩以刑罰要近功必不施以善

政怨氣塞天積骸蔽野又前人之覆轍失墮者撫巡將久
居流民開墾熟田一槩撥與官軍屯種名雖撫之實則逐
之欲其安生豈可得乎以臣愚見莫若於湖廣河南陝西
附近去處都司各衛選其家有生計智勇素著者以補軍
職有司官員擇其守已清介撫字有方者以補民職其御
史差替則照每年巡按事例務使流移各得其所田地儘
力耕種勿限其畝數稅糧減半報官暫停其往輸但係已
成業次不許奪彼與此一切造作營繕傷財勞力之事毋
得煩擾其犯罪避役非有原籍公文坐取不必窮其既往
亦惟欲相安以茲撫恤之至猶有梗化之徒取其渠魁必

誅不宥既不妄爲殺戮以求目前之安亦不專事姑息以
生意外之患如此則人心悅畏而地方自寧矣昔宋仁宗
時富弼知青州全活流民五十餘萬亦惟委任得人而處
置有道耳然彼其時正屬荒歉難爲功今其地頗有收成
易爲力此又所遇不同而宜審其勢也

皇明疏議輯畧卷八

釐正

扶植綱常疏

羅倫

臣聞 朝廷援揚溥故事起復李賢者臣竊謂平賢大臣
起復大事綱常風化之所繫天下後世之所監伏讀聖策
有曰朕夙夜惓惓欲正大綱舉萬目使人倫明於上風俗
厚於下 陛下是言真可爲國家扶綱常爲天地立民極
爲萬世開太平者也然欲正大綱莫先於明人倫厚風俗
欲明人倫厚風俗莫先於孝孝者天之經也地之義也國
而非此不可以爲國家而非此不可以爲家人而非此則

禽獸矣中華而非此則夷狄矣故先王制禮子有父母之
喪君命三年不過其門所以教人孝也古者求忠臣於孝
子之門誠以居家孝故忠可移於君爲人臣者未有不孝
於親而能忠於君者也爲人君者未有不教其臣以孝而
能得其臣之忠者也昔子夏問三年之喪金革之事無避
禮與孔子曰魯公伯禽有爲而爲之也今以三年之喪從
其例者吾弗知也 陛下於孝賢以金革之事起復之歟
則賢所未聞也以國家大臣起復之歟則禮未之見也以
故事大臣當起復歟則爲君者當以先王之禮教其臣爲
臣者當據先王之禮事其君臣不暇遠舉請以宋事言之

仁宗嘗以故事起復富弼矣弼之辭曰何必遵故事以遂前代之非但當據禮經以行今日之是仁宗卒從其請孝宗嘗以故事起復劉珙矣珙之辭曰身在草土之中國無門庭之寇難冒金革之名以私利祿之實孝宗允其辭此二君者未嘗拘當代之故事以強起其臣此二臣者亦未嘗循當代之故事以苟從其君故功澤加於當時名聲垂於後世史筆書之以爲盛事士夫誦之以爲美談此無他君能教其臣以孝臣有孝可移以忠於君也有是而後無復禮義史書之欲按例起復爲丞相王黼起復爲執政陳宜中起復爲宰相賈似道起復爲平章此數君者未嘗不

以當代之故事起其臣此數臣者未嘗不以當代之故事
從其君然生靈以之而困天下以之而亂社稷以之而傾
貽禍於當時遺臭於後世此無他君不教其臣以孝臣無
孝可移以忠其君也詩曰殷監不遠在夏后之世臣願
陛下以宋爲監使賢盡孝於君親爲萬世之大臣陛下
以禮處賢爲萬世之大君此臣之願也亦賢之分也若以
賢身任天下四方多虞而起復之與則仁宗之時契丹桀
驁宋爲無虞也孝宗之時金虜盛強宋爲無事也陛下
必欲賢任天下之事不專門內之私則賢身不可起口則
可言宜降溫詔俾如劉珙不以一身之戚而亡天下之憂

使賢於天下之事知之則必言言之則必盡陛下於賢之言聞之則必行行之則必力則賢雖不起復猶起復也使賢於天下之事知之而不言言之而有隱陛下於賢之言聞之而不行行之而不力則賢雖起復猶不起復也陛下無謂廟堂無賢臣衆庶無賢士君孟也臣水也孟圓則水圓孟方則水方君好諫則臣直好諛則臣佞陛下誠能於退朝之暇清閑之燕畧崇高貴重之勢親直諫博洽之士開懷延納降禮尊賢講聖學之大要明君道之急務詢政事之得失察生民之利病訪人才之賢否考古今之治亂諷風俗之盛衰於邊陲之緩急合一己之見而以

衆人之見爲見舍一己之知而以衆人之知爲知順旨之言則察而逐之使貢諛保寵者無以自容忤旨之言則容而受之使輸忠爲國者得以自盡群策畢陳衆賢並用則賢所欲言者人亦能言之又何必違先王之禮經拘先朝之故事損大臣之名節虧聖明之清化而後天下可治哉朝廷舉措大臣出處天下觀之史筆書之清議雖不行於朝廷天下以爲何如公論雖不行於今日後世以爲何如誠不可不懼也夫賢之起復猶諉之曰負天下之重任應先朝之故事比年以來朝廷以奪情爲常典縉紳以起復爲美名食稻衣錦之徒接踵廟堂據禮守經之士寂寥

無聞不知此人於天下之重何所關耶此事於先朝之故
事何所據耶先朝自揚潯之外未聞起復某人爲某官也
今起復之官何如此之多耶以其高謀遠慮足以建天下
之大議耶何未見其發也以其折衝禦侮足以定天下之
大難耶何未見其能也以其直節勁氣足以勵天下之士
習耶何未見其有也以其深仁厚澤足以浹天下之民心
耶何未見其行也以其忠言讜論足以裨朝政之闕失耶
何未見其敢也陛下何取於斯人而起復之哉意其平
昔之計不過阿媚權勢爲己地及遭道喪之時則必曲
爲諛說上蒙天聽不曰此人辦事理可奪情則曰此有故

事例當起復既遂奸計畧爲虛辭一見俞允欲然就位未
有堅請如富弼懇辭如劉珙者也且婦於舅姑喪亦三年
孫於祖父母禮有期服奪情於夫初無干其妻起復於父
初無干其子今或舍館如故妻孥不動乃號於天下曰本
欲終喪朝廷不容雖三尺童子臣恐其不信也爲人父者
所以望其子之報豈擬至於此哉爲人子者所以報其親
之心豈忍至於此哉枉已者未能直人忘親者豈能忠君
望其直人而先枉已望其忠君而先忘親 陛下何取於
斯人而起復之哉何不使之全孝於家而後移忠於國哉
昔富弼有母喪韓琦言起復非盛世事而富公竟不可奪

史嵩之遭父喪太學生留之至數百人嵩之竟乞終制今大臣起復群臣不以爲議且從而爲之辭所以豫爲已地也群臣起復大臣不以爲非且從而成其事亦所以豫爲已地也大臣既無忌群臣復何慙群臣既有例大臣復何辭今之大臣固韓琦富弼之罪人今之群臣又太學生之罪人也上下成風混然同流致有公無起復之例私爲匿服之計例在薄恩則匿服以受封例在得官則匿服以聽選例在撥科則匿服以應舉例在遷官則匿服以候遷例在求賄則匿服以之任率天下之人爲無父之歸臣不忍聖明之世風俗之敝綱常之壞一至於此也夫愛親之心

孩提有之短喪之說下愚耻言况在冠裳之列聞聖賢之道肯於其親無三年之愛乎特以貪利遂至忘親孔子曰是可忍也孰不可忍也又曰上有好者下必有甚焉者陛下誠能守先王之遺禮遵祖宗之成憲待之以禮義而不縻之以爵祿激之以廉耻而不誘之以名位使積習之弊脫然以除則忠孝之心油然而生向雖忘其親今則爲孝子向雖後其君今則爲忠臣亦理之所必有勢之所必至也特在乎陛下轉移之間何如耳天子者以孝治天下者也大臣者佐天子以治天下者也欲孝行於天下必先行於大臣臣願陛下不惑群議斷自聖衷取回內

臣許令李賢依富弼劉珙故事守制其余已起復者悉令終喪未起復者悉許守制脫有金革之事亦從墨衰之制任國事於外盡心喪於內將見朝廷既正則天下自正大臣既行則群臣自效人心丕運不可泯滅誰肯甘心爲不孝之子醜顏爲不忠之臣乎綱常由是而正人倫由是而明風俗由是而厚士心由是而純紀綱由是而張國勢由是而一矣

陳言輔治疏

王恕

伏覩祖訓條章內府各監局內官俱有定員各有職掌洪武永樂間未嘗額外濫設其太監等官非歷練老成雖

有聰明才俊亦不輕授近年以來則不然矣前者陛下
將內官論年通降蓋矯往年濫陞之弊欲復祖宗之舊
制也臣近聞又陞一起內官人數頗多不知是日前通降
者不知別是一起也前既以爲濫而通降之今不以爲濫
而復陞之似乎不可舉措如此其何以示天下陛下嗣
位之初人心歸向莫不稱頌而愛戴之蓋聞陛下在青
宮時存心正大不喜聲色不貴貨利及登寶位又罷貢獻
織造屏去珍奇玩好之物治近習蠹國亂正邪術欺君罔
上之罪遂刺麻番僧法王佛子國師輩罷傳奉冗員追
回濫賞莊田蟒衣等項裁抑奢侈本競凡此數事皆壞名

器損國體傷民財 陛下一旦而盡革之此天下臣民所以稱頌而愛戴之也夫何未久而又濫陞內官如此將見前數事不數年復如舊矣欲天下臣民稱頌而愛戴之如今日不可得已此天命去就人心離合之幾可不慎與况今北虜在邊災異迭見此正 君臣上下同加修省之時而 國政如此其何以服遠人而彌天變乎伏望自今伊始出入起居發號施令務要惟精惟一允執厥中遠宗堯舜之道近守 祖宗之法決不爲巧言所惑蹈襲前事上拂天意下失人心而爲 社稷之憂臣誠激於中詞不能婉無任戰慄

乞取回買玩好太監疏

王恕

臣始爲 朝廷軫念淮揚蘇松等府地方饑荒軍民流亡
恐臣等奉命不謹莫能區畫賑貸以致失所特遣近臣賫
內帑錢物遠來救濟既喜且懼者累日已而傳聞太監帶
百十號馬快船隻裝載私鹽于江南收買玩好之物雖未
委虛的第今大江南北饑荒殊甚斗米直七八十錢民有
饑色野有餓殍老稚轉于溝壑壯者散而之四方不可勝
數臣奉勅往來提督賑濟近來雖頗安妥而張口待哺者
尚多若太監此行爲賑濟饑荒而來則大江南北億萬生
靈蒙再造之恩 陛下盛德大業可以比隆二帝三王國

祚可以與天地相爲悠久矣若爲收買玩好之物而來佞
此聲勢張皇未免搔擾郡邑驚嚇吏民臣恐遠近傳聞將
謂陛下惟珍奇是好而無憂民之心致使狂夫得以藉
口非社稷之福也臣以爲當此饑荒之際朝廷正宜裁冗
費却貢獻禁奢侈抑僥倖慎爵賞重名器輕徭役惜民力
以收天下之心以培億萬年社稷之基本夫何織造旁午
貢獻絡繹奢侈之風競起倖進之門大開遂使爵賞冗濫
名器混淆徭役繁興財力日屈欲斯民之不貧且盜得乎
昔唐太祖遣使往涼州諷李大亮獻名鷹而大亮不可明
皇令蓋州織半臂襪子琵琶捍撥鏤牙合子等蘇許公不

奉詔其事載諸信史後之讀史者莫不稱太宗明皇之明
李大亮蘇許公之忠今陛下以上聖之資居至尊之位
聰明睿知本乎天性仁孝誠敬不待勉強可以爲堯舜可
以邁湯武尚何太宗明皇之足言哉臣幸際明時備員巡
撫偶有所聞若隱忍不言使陛下不知而天下國家受
其弊豈忠臣乎非惟有愧於臯夔稷契伊傅周召豈不有
愧於李大亮蘇許公之輩是以臣不避斧鉞爲陛下言
之者非爲身家計也爲社稷計耳惟陛下留神深思社
稷幸甚生民幸甚

請復經筵疏

涉鼎

臣近聞尚書王恕陳言講學疏德暫止經筵尋又聞司禮
太監覃昌傳奉 聖旨經筵暫免待八月來說者臣初聞
之既驚且駭蓋以王恕職兼師保寔經筵侍從官也不宜
有此陳請 陛下少主正經筵講學時也不宜有此傳奉
將信且疑次日早朝接見之臣莫不爭相傳誦驚駭以爲
異事臣備員堂諫職當言訟苟有所見奚容緘默謹披拾
衆論附以鄙見昧死爲 陛下陳之竊惟人君愛人之要
莫先于孝人君講學之功莫大於勤蓋學則心術開明而
於義利公私有定是勤則志意堅確而於躬行實踐有定
守故以成湯之聖每致警於盤銘之辭以武王之聖恒究

心於丹書之戒聖如大舜益之戒猶曰罔遊于逸罔淫于樂治如成王周公之戒猶曰無淫于觀于逸遊于畋是知人君養心之學不容少緩講學之功豈容不勤也哉歷考前古有天下國家之責者未有不以學而明不學而昏亦未有不以勤而興以逸而廢也洪惟我高皇帝開創之初首定經筵之制朝夕講論又妙選海內文學之士教授皇太子及諸王經史文皇帝經筵之外又設內閣學士以備顧問攷究古今剗剗治道列聖相承率以經筵爲第一事誠我國家之令典列聖之盛事也仰惟陛下昔在青宮已勤講讀今承大寶益務精專待從之官既量加

祿秩經筵之官復通賜鉉幣仍降德音勉以啓沃寵遇優渥古所未聞然陛下好學之勤已出於天性勤學之功亦不假于勉強自臨御以來朝退之餘即御文華既每日一小講又每旬一大講聞于耳皆經生學子雖曰講讀過隨即掩卷雖曰接見片時輒復退散能由此持久而不懈怠始終而不間斷庶幾從容涵泳學日加修優游漸漬德日加進所以涵養君心成就君德以成格心之正學以收作聖之全功者亦未必不基於此也凡爲臣子者仰見陛下講學之勤莫不交相慶幸咸以陛下爲英明勇智不世出之聖主也亦莫不傾心拭目以觀作止以驗勤怠

凡進言之臣如吏部侍郎楊守陳浙江按察司副使鄭紀
鳳陽壽州知州劉聚等又莫不首先以此爲勸勉經筵講
學此實爲君者之急務爲臣子者進言第一事也頃者翰
林院侍講王臣復以時將盛夏深懼 陛下怠心或萌不
遵 祖宗之故事獨援近來新例而暫廢經筵講學之功
又嘗先事進言荷蒙 陛下俱賜嘉納凡爲臣子者又莫
不争相慶幸以爲 陛下講學之功可保其無間不意今
日乃有此事則 陛下旬月之間言行遽相戾如此廢講
學于數月失大信于天下使言者不信聞者見疑關係國
家其故非細若曰 陛下欲經筵進講而怨惟昧於所保

倡爲此說以止之則恕惟不知大臣之道矣萬一窺見

陛下將有免經筵之心而爲此說以逢迎之則恕之罪惡
殆有不可言者豈惟不知大臣之道而已耶昔唐宦官仇
士良教其徒固寵之術曰天子不可令閑常宜以奢靡娛
其耳目使日新月盛無暇更及他事然後吾輩可以得志
慎勿使之讀書親近儒生彼見前代興亡心知憂懼吾輩
下矣恕不能反其言而導君勤學以勝彼固寵之術則恕
之兄又宦官之不如也然王恕之奏方進而傳奉之旨遂
下今已數日矣周洪謨丘濬劉吉等又經筵之領袖者也
皆坐視陛下逸豫而廢講學之功畧無一人進言臣不

知前日 陛下擢任之隆錙幣之鈔啓沃之勉不識其果
何爲而設也竊經筵待從之虛名廢經筵勸講之實事其
負 陛下蓋萬萬也借曰時方盛夏臣子苟圖一時之安
獨不念 陛下春秋英妙經筵急務講學一日則有一日
之益廢學一日則有一日之損經筵之官講學一日則盡
一日之職廢學一日則虛一日之費此臣所以盡言爲
陛下陳之也臣於篇終尤竊憂之 陛下初臨大寶獨攬
乾剛政事雖漸清明賢才雖漸舉用奸霧雖漸屏斥當此
之時百度尚未盡舉災異尚未盡銷然庶尚未盡安盜賊
尚未盡彌四夷尚未盡服正 陛下講學憂勤圖治之時

也然 陛下前日暫免午朝臣嘗疾首今日暫免經筵臣
實痛心伏願 陛下獨斷宸衷不惑左右以六月初一日
爲始仍日御經筵日視午朝以崇聖學以圖治理仰答天
命之眷顧 祖宗之付托以副進言者之願望以解天下
臣民之疑則 陛下好學之誠選善之美真可以比隆湯
武匹休 祖宗垂法子孫傳誦萬世矣

乞止漁獵疏

于謙

臣聞近該內官監太監陳瑾題稱本監差內使管領打捕
戶於真定河間捕野味打魚合用扛擡軍士人夫雖奉
聖旨只着本監魚捕戶自行打有時起送遞運所船隻車

輒遞送前來不許勞動攪擾軍民犯的不饒臣有以見
皇上愛養人力而不欲勞擾軍民之盛心矣但真定河間
并直沽等處遭寇賊擾攘之餘正人心未定之際而所在
軍民流移公私匱乏屢蒙 恩例寬恤一時未能蘇息如
以天旱不雨五穀未種頭畜牲口損失迨盡而軍衛有司
通運所選集軍餘民忙備守城池地方或借倩車輛船隻
運送軍器物件差役繁重非止一端況即目當春夏長養
之時正物類生育之際所宜對時育物以廣好生之仁兼
且天氣日漸炎熱醃造亦非所宜萬一採取失時恐難食
用乞將前項事務暫且停緩待秋成之後斟酌整理如此

則人物咸得其所公私兩得其安而事體求爲利便臣叨
受國恩備員輔導苟有所見不敢不言

革西廠疏

商輅

伏惟皇上寬仁大度省刑薄斂慈仁愛人之心感孚于
上下天何近日伺察太繁法令太急刑網太密官校望風
生事人心洶洶各懷疑畏内外文武重臣託之爲股肱心
膂者也舉皆不安於位百司庶府之官資之以建立政事
者也亦皆不安於職商賈不安於市行旅不安于途士卒
不安於伍庶民不安於業究其所以蓋緣陛下委聽斷
於汪直一人而汪直者轉寄耳目於群小而群小之中其

奸謀足以顛倒是非其巧佞足以蠱惑人心如蕭瑒者自言親承密旨得專予奪之柄自謂百官進退盡在掌握之中擅作威福虎張聲勢其間同惡相濟如王瑛者則以附已而薦之稍存公論有所諫正者則以異已而黜之原其立心惟知希求進用以爲一身之榮不思傷害善良虧損國體大爲聖德之累往者曹欽之反皆由是果生事有以激之人所共知可爲明監昔唐太宗當天下甫定之後骨肉相殘群雄側目嫌疑之際宜乎過慎也而乃從魏徵仁義之言拒封德彝刑罰之說遂至海內殷富斗米登錢外戶不閉幾於刑措太宗因封德彝死謂群臣曰此魏徵

勸我行仁義之效也恨不令封德彝見之夫德修而民自
化法急而民愈亂考之前史歷歷可驗孔子曰道之以政
齊之以刑民免而無耻道之以德齊之以禮有耻且格我
國家積德百有餘年深仁厚澤浹洽於人四方萬國孰不
歸戴 陛下爲守文令主嚴刑峻法誠非所宜况今天鳴
地震無處無之水旱災傷日甚一日省躬念咎彌災息患
之道莫先於恤刑獄莫要於安人心而乃反此一旦有警
變且莫測可不懼乎伏願體天道之包容遵 祖宗之成
憲旨意必經於六科奏訖必由於通政責政事於府部付
刑法於法司收回伺察之人誅逐奸邪之輩其有謀逆奸

細并貪賊壞法重情悉依舊規委任歷練老成之人管理
如此則讒言不入於耳自足以順情而養神苛政不加於
下自足以安邦而定國不然此風日長衆口嗷嗷國之安
危未可知矣若舊設行事人員專一緝訪謀反妖言強盜
人命及盜倉庫錢糧等項大事今西廠却搜尋細故凡街
市鬪毆罵詈爭雞縱犬一時躲避不及者或捶楚或煩瀆
聖聽置於重法以致在城軍民驚惶不安至若官員犯罪
追贓者法司自有成規今西廠擅封兵部武選司門官員
有犯正身未曾問招先將本家門封閉或寅夜越牆進入
搜檢財物或將命婦剥去衣服用刑辱打被害之家有同

世創以致各衙門大小官員驚惶不安若從此不止日後
或有奸人強盜假名害人者真偽何由而辨京營管軍頭
目俱係朝廷托以重寄之人其公私勤惰自有賞罰今西
廠不論有無事情一槩令人跟緝鈴束以致各懷危疑至
如各處鎮守總兵等官乃一方安危所係既被選用當任
之無疑今西廠各處差人採聽事情彼其聞知寧不慮恐
誤事非輕河道係兩京各處錢糧貨物經由之路要在通
行不宜阻滯今西廠官校分布沿河一帶遇有船到即加
盤問有公差官員被其搜檢以致往來客商軍民人等聞
風驚疑有米起程停止不來者有在中途寄放回還者似

此貨物不通將來京師公私費用何以仰給抑恐奸盜假
此搜括劫人卒難禁止夫 朝廷威福不可下移自立西
廠之後太監汪直每日出外跟隨之人數多但遇官員人
等無不喝令下馬雖大臣亦謹迴避如兵部尚書項忠當
早朝之時汪直令校尉就左掖門下擁逼而去其欺凌大
臣如此至如法司郎中御史等官每遇吊查文卷俱要親
齎赴廠竟日伺候不得一見又如東西兩長安門牌上用
黃紙帖寫太監汪傳奉 聖旨不書其名滿朝官員見者
無不驚駭百戶常瑛係無藉小人累投勢要不肯容留今
倖寅緣投入西廠發人事情言多失實又引進譎詐小人

王英結爲心腹訐人陰私以固信任臣謂此等事情非惟
與治體相關又與天道災異相關何也此處七月以後有
妖物出自西北遶城傷人當時人言必有應驗及妖怪方
出遂立西廠驚駭人心一如妖物傷人之時以此觀之天
道示戒不可不慮今太監汪直年幼未諳世事止憑常瑛
等主使呈報中間固有一二似爲禁革奸弊奈非祖宗
舊制所革未多其失人心則已甚矣中外騷然安保其無
意外不測之變若不早爲除革一旦禍興卒難消彌伏望
皇上斷自宸衷革去西廠罷黜汪直閒住以全其身將常
瑛王英拿送推問治以重罪如此則人心可安天意可

回矣

乞罷齋醮進香疏

張寧

臣聞釋道之教邃古所無下
主壽考世運靈長後世衰
昔可知夫父子君臣夫婦
體國立法修政建事無非
五者順序百廢以寧是以
為彼佛老之法不足以有
夫婦一切歸諸虛無寂滅
育頃絕不過百年人類盡
至漢唐其法寢盛然三代君
相仍年祚少永釋老無補視
弟朋友長幼人之大倫自古
此五者而為之經理防範耳
人之道始于有為而終於無
為而強於無為遂欲去君臣廢
使其教盡行則婚姻既無生
雖有事物將誰用之歷代英

君誼辟有見於此非不欲深惡而痛革之特以其頗能倡禍福輪迴之空談警動於人

爲治化之外一術耳非真謂其能扶世立教延永國步而

爲之崇奉也恭惟皇上曩在青宮繼登大寶夙精儒學

日御經筵于凡治亂之由正邪之辨洞明深識允蹈躬行

當即位之初詔天下寺觀不許藏匿無度牒僧道等項尋

奉睿旨不許增修寺觀乞請額名傳之將來固當求遠無

弊矣邇者恭遇皇太后誕日令僧道建設齋醮此固

皇上將欲表揚孝道慰悅聖慈無所不用其極之心也諸

大臣及百職事但當和衷助德仰贊至情上綏慈祉則心

誠道得允合舊章而禮部尚書姚夔等乃歛會財物收辦
炷香約以至期赴壇行禮爲儒者自矢其守業彼者烏知
其非臣雖至愚爲此深懼切惟人臣之於君願其福也則
當勸以修德善願其壽也則當勸以去逸慾願天之心向
順也則當相之以和保小民康濟四海故曰求福不回天
壽平格又曰欲王以小民受天永命未聞有以禱祠得福
丹藥致壽假符瑞以求天命者今乃不能盡所當爲徒以
辦香尺楮列名其上宣揚於佛老之神相率而拜曰爲
朝廷祈福禱壽天地鬼神山川河嶽昭布森列可厚誣如
是哉昔孔子之於異端孟子之於楊墨韓愈歐陽修諸儒

之於佛老爲其惑世誣民克塞仁義故辭而闕之今若弗
禁其流不止於惑與誣矣通國之人靡然相從仁義不止
於克塞矣學聖賢之學者既不能闕而排之又不能以正
自處天下後世謂之何哉伏惟 英宗廟 皇帝當復位
之初國事多虞有疾其時一二大臣所見不遠不察古人
行禱之意故嘗舉行此事蓋亦一時臣子迫切至情事不
得已然非 祖宗之舊典先帝之本心也因循至今實意
不存尚沿故習夫臣之於君猶子之於父一指一髮皆其
長養一飲一食皆其賜予若能以齋醮助國雖殺身亦所
不辭豈敢自以儒者門戶爲此倔強與彼相較量哉但以

無益事情徒傷大體其於經筵聖學不無畧有所干其於
進講儒臣亦恐難以身勸伏望 皇上法古昔聖賢正當
道之心監太學術義明道術之語勅命諸臣凡遇慶賀不
許擅備炷香於寺觀庶可以扶名教振士風全一代之治
體而與三代之時並隆矣

乞止親藩入朝疏

倪岳

弘治八年七月奉 聖旨 聖祖母聖慈仁壽太皇太后
年高念叔崇王欲得一見便寫勅差官取來欽此欽遵中
外臣民伏聞 詔旨皆有以知 太皇太后慈愛之至情
皇帝陛下順承之大孝雖大舜文王無以加矣但一時人

心竊以朝廷事必須上揆天心下察人事務出萬全庶幾可動然以今日論之事有未便者三焉又非前議之所及者蓋近來傳聞黃河泛漲水高於岸平日波流湍急舟行已難加以泛漲其爲洶湧必異常時王欲來朝乃舟楫必經之地則夫驚震之患所不能無保護之責誰敢當之此其未便者一也兼聞河南彰德衛輝二府自春徂夏一雨不霑寸草不生赤地千里人民流動殆三之二夫馬艱窘不言可知王欲來朝乃車馬必經之地不獨供億之費無所給萬一盜賊乘時竊發則夫震驚之患所不能無保護之責誰敢當之此其未便者二也况二年之間三王之國

近自京師之軍民遠而所過之郡縣百倍供需十分騷擾
官無所措手民不能聊生言之可爲寒心見者欲爲流涕
今若加以崇主來朝先聲所及人必驚疑送往迎來勞費
增倍瘡殘之民何以當此此其未便者三也此皆切於今
日之急務於理不可不預爲之慮者今果奉命來朝雖少
遂一時欲見之心然欲別則難免眷戀不捨之情既去必
培增憂思不忘之念他日上厯聖慮所未敢言雖欲悔
之殆無及矣伏望皇上追寢成命暫免來朝別選親信
內臣厚齎賞賚往視以慰其心庶於公義私恩可以兩盡

乞傳送武當神象疏

馬文昇

臣查得近該御用監太監王端等黃快船六十隻帶去官
舍勇士人匠八十六員名往武昌山送玄帝神象近又該
汝王之國竊聞直隸池州等府貴池等縣地方五月十一
日起十三日止驟雨連綿山水泛漲勢約三天淹死男婦
二百六十一名口漂流居民房屋一千九百餘間又聞河
南山東南直隸遼東山西自七月以來天降驟雨平地水
深數丈漫倒城垣淹沒田禾自通州直抵湖廣江河兩岸
咸被水災而河南黃河之水爲害尤甚各處秋田無收况
今陝西胡虜在套勢甚猖獗未見勦平勞及三省民不聊
生而遼東夷虜亦未寧靜湖貴前夷倡亂方且用兵此天

下多事之秋也仰惟 皇上奉送玄帝神像於武當山固是爲國爲民祈福之意而神亦以好生憫物爲心臣昔巡按湖廣親詣本山看得宮殿雄麗神像尊嚴無以復加矣皇上若欲奉送神像使時年豐稔遠方無事不甚勞傷且猶不可况今天下水旱蝗蝗遠方用兵親王之國民困財竭之際而乃有此舉甚非所宜恐神不安而福亦不降矣欽命內臣并帶去官員匠役如此之多去處該用人夫動輒數千差去官員固爲安靜終是有傷况自京城至於通州道路泥濘人馬難行尤爲不便臣若不懇切言之則臣負 國之罪將何所道哉伏望憫念生靈察臣愚悃將前

神像暫且停送候年時豐稔遑方寧靜民困少蘇之日送
去亦不爲晚倘納臣言 崇社幸甚天下幸甚

扶持國本疏

林俊

臣惟人君之德莫大於聽納臣子之罪莫加於欺罔今年
以來災異迭興兩京地震陵寢動搖日月繼食野熊入城
監戒之昭莫此爲甚而醜虜陸梁犯我北鄙邊民騷擾戍
卒咨怨此誠不可不爲之慮也臣愚謂此尚手足之疾爾
陝西山西河南連年飢荒陝西尤甚人民流徙別郡及荆
襄等處日數萬計甚者闔縣無人疴者十亡七八倉庫罄
懸拯救無法樹皮草根食取已竭飢死填路惡氣薰天道

路聞知莫不流涕而撫按三司等官肉食役土既知荒旱
自合先期聞奏伏候聖裁顧乃茫然無知愬不加意勢至
若此尚猶顧盼徘徊專事蒙蔽視民餓殍而不恤輕國重
地而不言夫物極則變草澤之中禍深難測此誠腹心危
急之疾治之當如拯溺救焚不可稍緩者也乃者學士萬
安等具言許生員人等納米是乃救荒之一策但此等欲
事輕賚則彼地空之買米無從欲他方轉運則困於剗掠
道里難進臣恐緩不及事爲今之計宜下寬恤之詔重欺
罔之罪以收人心即遣才力大臣并科道部屬廉能等官
分賫內帑之財星馳前去臨清等處聽其地里近便有運

到官糧或隣封積蓄官爲顧車裝運兼程以行隨在賑濟
則未死之餘民猶或可及然臣又有說焉孟軻有言死亦
我所惡所惡有甚乎死者故患有不避臣說得行則可
洩天地神人之憤快 聖祖神宗之心彰 陛下爲聰納
聖明之主真 宗社萬年無疆之休萬一忤旨禍止臣一
身爾何惜一身之死不爲 陛下盡陳之臣聞老氏之說
怪誕無徵佛氏之教幻妄無取故其事不見於堯舜禹湯
之世其誣每見於唐宋齊梁之間儒先之論史冊所稽不
可泯也謹按僧人繼曉本一儉險小人市井無賴向者猥
持邪術欺誑楚府及至事敗捉拿却乃竄身逃罪不圖自

新愈加詐誕潛住京師多方蠶緣誤蒙 聖眷疊賜異恩
五尺兒童切齒唾罵敢復肆無忌憚欺罔聖聰發內府銀
拾萬兩蓋鎮國永昌寺臣細思之 陛下聰明齊聖斷不
爲此是必繼曉謬爲大言謂此寺一建則聖壽益長國祚
益昌民命益永邊境可寧而以此囑 陛下爾曾不知以
有用之財供無用之費國計且日削矣以 陛下超三邁
五之資蹈漢武唐憲之轍聖鑒且日損矣下人師師爭先
事佛聖政且日壞矣居民重遷工役不息人怨且日興矣
縱如繼曉之言先王之政必不務此况萬無是理顧有大
害者乎昔懿公好鶴鶴有乘軒者將戰國人受甲者皆曰

使鶴實有祿位于焉能戰夫鶴之好似若未甚失民尚如此伏望陛下以類推之臣謂不斬繼曉異日之禍未可言也雖然縱之者梁芳也梁芳傾覆陰狠引用邪佞攬斥忠良輔之者驟得美官觸之者動遭寬逐剛愎似趙高奢侈如石崇數年之間假進貢實辦爲名盜祖宗百餘年之府藏殆盡家資山積尚銘不足多所在紛擾注直莫能過乃復陰求蓋寺虛耗內財詭語外人謂其極意不肯爲被陛下再三迫逼只得屈從是畏天下謗已欲陛下專受謗爾大臣善則稱君過則歸己今梁芳欲文已奸而以過歸陛下即此一罪已不容諱矣且財者國家之元

氣梁芳盜而有之盜 皇陵一坯土尚誅無赦盜國家之
元氣又何如耶臣斷謂粉梁芳之身不足償其罪之萬一
爾臣德不見信職非言官熟知自默可以保位固祿乃不
自揣量與此二奸臣抗可否是猶蝸觸山蛾赴火已不言
智然臣謂牛司耕犬司守走獸至微亦以勞而食也臣食
於 陛下且七年矣近年以來徭蒙增秩感愧無地中夜
心畏涕淚交流謂人主深居九重利害豈能悉知而 祖
宗在天之靈亦望臣等以言進於 陛下也今內而大臣
次而百官以及閭井之徒亦皆痛心飢民之死欲啗繼曉
之肉而卒不敢以此言進者以惜官之心重於死也

使臣復不言則陛下終不悟 祖宗在天謂臣等何如
今天下後世謂臣等何如人操筆史官必譏笑臣等恐亦
將及 陛下矣昔魏任座答文侯何如主之問以直觸怒
乃問翟璜璜曰仁君也曰何以知之曰君仁則臣直向者
任座之言直是以知之文侯使璜召座親下堂迎之以爲
上客臣不敢過望此然亦豈忍懷不直之言爲 陛下累
也惟陛下留神觀覽熟計而決行之則祖宗之光社稷之
福臣民萬世之幸也

省冗濫以蘇民困疏

黃瓚

竊以重歛足以困民冗官足以病國故設官而無損於民

有益于事存之可也設官而無益於事有害於民去之可也併省之可也今觀臨清廣積二倉舊惟監督內臣一員後增至二員天順等年亟罷其後增至九員正德五年裁革三員止存六員正德六年存留三員近增一十五員則前此所未有也夫臨清一州鎮守太監既駐節其地而戶部工部糧鈔管閫兵備等官竝亦有事於此於勢既不可缺其費固已不貲至於監督之臣與部官協同監收內外燕臨已足防制雖僅一員可矣否則二員增至四員亦已過矣今之倉糧額數未能有加於昔而監督之設乃獨數倍於前何也夫官多則承稟亦多而非一人之所能專其

勢徒足以相擾而實無益於事其宜省一也官多則供應寔繁而非一州之所能辦其費至合十數州縣之力而猶缺於用其宜省二也居處不一司府公署皆分布而居其守巡等官每無所寄寓其宜省三也投跟者衆僕御騎從相望於途而驛遞衙門日不暇給其宜省四也斗級困於誅求應役一年費銀百兩往往鬻產而破家其宜省五也糧戶疲於取索納米一千石用銀八九十兩往往繁官而死獄其宜省六也其尤可慮者臨清本天下之要區北拱京師南通江淮西亘韓魏宜使其人民日益庶富商賈日益輻輳可也今之時特居民愁困十巡五六而富商大

賈苦於和買亦皆蕪業而他遷貿易之所日見其稀落矣夫國無重鎮則形勢不張人有憂心則保障未固此其所宜省者七也况山東連年災盜所在凋瘵臨清之民困已甚矣不得已而傍借十數州縣併力以助其十數州縣者亦非有餘財也計其勢固將併困矣若復借給不已又將復求於他狼狽不支無可爲謀矣其困果何所止乎夫民之困也政使撫之猶恐其不及又從而重困之欲其不爲盜不可得也爲盜不已欲其不相延而爲亂亦不可得也臣惟山東一省災盜相仍賦役繁重公私逋負殆將幾萬老穉流移動至千百近者礦賊繼竊於淄青饗惠之徒復

馳薦於濱蒲臣以欲爲地方計者莫先於安百姓欲爲百姓計者莫先於節財力欲節財力則去冗食以省浮費今日第一事也何以言之於一邑一州者可言也弊在於一時一日者可言也臨清廣積二倉舊設監督內臣其員未至甚多其費未至甚廣臨清之民亦已病之而當時已有建議於朝欲併省之者矣今所領不過一事所臨不過二倉何至以拾伍員之多而群聚於一州之內前日一州之困今且遍遺一省前日數百之費今已倍增數千而其他征求需索之弊有不可以盡述者况聽差銀兩本已盡丁門而取亦祇爲料價而設今各官建議欲行借給臣

等雖暫徇其情其亦一時補救之術非後來可繼之道若
監督等官今不裁省將來供給愈重欲取之於民而民無
可取欲借之於官而官無可借即欲更爲無已之斂是恐
別生不測之憂臣等誠有所未安也且撫民之方不必求
以與之苟無以取之可也御民之術不必求以威之苟有
以來之足矣伏望 皇上俯念小民之艱難重惟地方之
至計大發乾斷悉去冗員則奸弊既革供給太省而東方
之民亦可以漸蘇矣

裁革中官疏

汪循

近日伏聞

朝報工部尚書曾鑑等題本開坐軍容華

二局添設管事內官上請裁減蓋奉行詔書內事理也
陛下不蒙裁減又令司禮監查正統天順年例來看臣愚
以爲陛下不欲裁減內官不必形諸明詔既以形諸
明詔可革即革當裁決裁何必復看王者承天號令明如
日月信如四時威如雷霆況陛下即位之始發令之初
著爲詔書頒示天下宣播四夷維新之政未踰三月即
有二命何以遵行然此意先帝之時已有成命矣誠以
中官管事其害不小非但各門庫局爲然在在有之但管
一事則敗一事到一方則害一方而竄守典兵抽分倉場
錢穀之司其害尤爲大也若然言生於下則災異形於上

先帝修德弭災明知其故欲行裁革不幸中道崩殂臣民
失望夫孝者善繼人之志善述人之事者也武王纘太王
王季文王之緒周公承文武之業聖人稱爲達孝今陛
下崇達孝之心欲述先帝已爲之事在內監之設官有
定員職有常事只掌官禁服御之需未嘗預朝廷之政
具載皇明祖訓者昭昭可查也陛下舍此不查而令
查正統天順年間事例則悞矣自夫添設中官寵信太過
致有王振售奸吉祥不軌聖鑒公應幾危社稷正統天順
善政固多而中官一事則可以爲鑒而不可以爲法也二
命既下大臣委靡承順不復開陳科道坐視旁觀不即匡

救誰之咎歟自古天下之事常起於微成於漸而盛於極
宋儒周惇頤曰天下勢而已矣勢輕重也極重不可反識
其重而亟反之可也識不早力不芴也臣愚以爲今日之
勢亦將重矣識之不早反之不力恐難善其後矣臣嘗讀
史至唐天寶之亂宋靖康之變未嘗不痛心扼腕以爲自
古賢君厲精圖治莫不制治於未亂保邦於未危尤必進
君子聽忠言如唐太宗能容王珪魏徵之直宋仁宗能納
范仲淹唐介之忠賢臣獻言亦必謹禍於微慮患於早如
賈山以過秦爲譬晁誼爲之痛哭蘇轍以六君爲比蘇軾
爲之深悲况今人事接攘之秋天命絕續之會自陛下

即位以來陰雨霪霪行踰三月夫天之道晴日恒多陰雨
恒少陽恒使其有餘陰恒使其不足今也天道反常必有
其應天心仁愛其在茲乎孟子曰入則無法家拂士出則
無敵國外患者國恒亡亦以事幾兆於無形禍亂生於所
忽陛下春秋方茂初試萬機不宜長處深宮惟以二三
中貴傳命于外側聞先帝宮車宴駕之時親執輔臣之
手令少師劉健少傅李東陽謝遷諸臣實親受顧托者也
吏部尚書馬文昇兵部尚書劉大夏都御史戴珊諸臣亦
先帝不時召見與決大事者也陛下當召至便殿興論
朝廷政事得失詢訪天下軍民利病群臣章疏必躬省覽

與之量度去取次第而行至於詔書已行頒布中外豈
容不信臣願陛下毅然行之不沮於浮言不惑於讒說
不厄於近邇之人詔書容有所未備者仍乞推類以盡
其餘續成先帝之至德光復祖宗之舊章然念自古
直言之臣多便於朝廷而不便於權倖多利於天下而不
利於一身往往言發而禍應計行而身戮臣非不知固位
保祿爰爰然而不止者豈厭久生而樂速死哉顧以所欲
有大於生所惡有甚於死者耳臣不勝憤激之至

塞倖門廣言路疏

劉玉

竊以銓選者建邦之大柄聽納者治世之良規倖門一開

則辟枉竝進言路一塞則庶政日隳治理所關匪直細故而已也昔舜命九官咨於岳牧所以求其當而付之公也肆我祖宗法古致治凡文武員缺輕則該部擬授重則曾推上請亦所以求其當而付之公也 陛下即位之初勵精圖治革傳奉以清仕途而近年以來倖門復啓孫伯堅等既以傳奉而列文階金琦等又以傳奉而任武職傳奉不已繼之內批始則主寧以之而登州備倭今之胡震以之而通州分守舉之不出於公用之不求其當其視帝王致治 祖宗立法 陛下初政豈不矛盾哉然以傳奉而較內批則載於宸翰而絲綸得以奪銓衡之職率是

而行公法盡廢而正途塞矣且王寧實錄之初兵部科道
猶名盡言爭之曾幾何時胡震鍾其故智而向之爭者遂
不復爭可見 聖志稍移則群心益靡駸駸之勢將譏言
不復聞而百職廢矣况今天下武備廢弛山陝遼蜀外虜
凱梁江廣雲貴內寇竊發武臣職事雖博采於衆以求其
人猶恐非稱若王寧胡震之爲人臣雖不知然觀其旁緣
戚里賄賂潛通以求苟得是豈能鼓勇以敵愾哉不過怙
勢以肆其威剝軍以償其利任之一方則害一方布之天
下則害天下可逆觀也設以成命不可復回竊恐百世之
下萬一有大奸慝欲干事權阻於公論而營內批必援今

以爲例則是傳之百世而害百世又非特一時之害而已
也是故防患者貴微除惡者務本玄宗停斜封而致開元
仁宗收內降而臻慶曆以陛下明聖加之以斷其於是
何有哉伏望覽既往之迹察將來之弊將王寧全琦孫伯
堅等革退仍將胡震送法司明正其罪杜絕內批禁止傳
奉申飭庶僚各慎厥職庶幾退一人而群邪自消納一言
而衆善斯集治理之成必比隆於堯舜矣

陳言時弊疏

馬昂

切見京師之間近日以來光祿寺往往差人買辦物件外
至三四十里內自大小街巷凡販賣之物一遇厨役強買

不論本利有無甚至將人家養畜亦行括取雖稱官爲估
價給與鈔貫然內府錢物不昉關給及至關給或已回
散豈得領受况所領鈔貫數多破朽故街市有賣之人每
遇厨役官買號泣痛哭如遭搶奪切惟負販之人多因家
無產業或揭借本錢或賒鬻物貨竭筋力於奔走圖濡利
於朝夕父母妻子賴之以供養官府科徵資之以辦納一
遇官買本利俱失生計蕭然實可憐憫况我國家富有
四海貢備九州凡光祿寺供用之物天下州郡既有歲辦
之額又有進納之數皆足於用原其所以不足者盖由官
掖之間宣索過額供用之人侵欺花費故也恭惟陛下

天資仁厚凡四方萬國皆在慈愛之中豈忍輦轂之下有此漁奪之事望一陛下念京師根本之地憫生民貧賤之艱特勅該部并光祿寺今後上供之數務從節約其所買之物依時估價給與毋得似前豪奪低抑價值則負販無乾沒之苦街市絕怨咨之聲庶幾近悅遠來內安外順而惠綏之效以臻矣

乞停遣使西域疏

毛紀

切照烏思藏地方僻在西隅數萬里之外其地習俗鄙惡語言侏離與中國懸絕中國之人亦鮮有至其地者祖宗之時番僧雖嘗入貢賜以法王國師等號不過因而命

之空名虛秩居其本土藉以撫化番衆使無擾我邊境而
已非崇信其教留居中國令入禁內如前代之事佛求福
者此也前代事佛求福反更得禍史冊載之可爲萬世之
明鑑仰惟 陛下神仁聖武天縱聰明曩在春宮懋學毓
德繼膺寶祚任賢圖治天下之人拭目延頸以望太平今
無故而爲此舉朝野聞之咸加駭異以爲堂堂天朝衣冠
文物之區道德綱常之化而顧從事於夷狄之陋哉且異
端邪說人人皆知其非 聖明在上詎肯崇信臣亦知此
非出於 陛下之本意也實由番徒造爲一切幻妄怪誕
之說上瀆 聖聰 陛下偶爾聽之不計其累一至於此

況本夷年例進貢自有舊定常格差遣伴送亦有通事人員揆之事體似不可以煩 朝廷近臣之往番供送也雖曰 先朝嘗有此例當時庶政修舉教化大行海內富庶百姓安樂偶一行之亦不甚損即今各處災異頻仍人民困苦盜賊生發虜寇猖獗兵戈相尋未已倉庫所在空虛而四川等處腹裏之患甫平松潘之警繼至瘡痍滿目呻吟滿耳地方之疲弊極矣當此之時正宜勞心竭力多方拯濟猶恐弗及尚忍復有此騷擾煩費之舉哉昔漢光武閉玉關以謝西域之貢千古稱之以爲美談夫光武七制之賢君也而況不爲光武者乎伏望 陛下俯察愚忠收

回成命以彰乾剛之斷離照之明使天下後世稱爲茫
之聖實臣等之至願也